

692.

13^e. part in 12.

23

FRANCOPHILIE

PRESENTEE

AVROY.

SVR LA

RESOLUTION

de son voyage.

Par le Sr. Mangeart. A.



M. D C. X X I I.

82

PRINTED

BRITISH MUSEUM
LONDON

Y O R V

ASST. V.

W O T T I O

CASE

F


39

326

1622 m2

THE NEWBERRY
LIBRARY

1822-30



FRANCOPHILIE

présentée au Roy,

Sur la resolution de son voyage.



I R E,

La modestie & grandeur
de courage que Cesar fist pa-
roistre, quand de retour qu'il
fut d'Apollonie, il alla visiter Anthoine,
comme estant lors des plus Anciens, tant
pour le nombre de ses années, que pour sa
dignité consulaire, me fait ietter l'œil sur
vous (genereux rejetton du valeureux
HENRY, qui doit servir de tige à tant
d'Illustres Princes) en ce que voyant le Se-
nat & bonne partie du peuple, qui se lais-
soit empoisonner des douceurs, que sa Su-

A ij

perbe receloit parmy les amertumes, & encliner à la volonté de celuy, qui comme téméraire osoit entreprendre de partager la gloire des conquestes de son pere, & mesurer ses Palmes à la grandeur de ses forces: Il monstra par sa prompte obeyssance comme son dessein n'estoit de s'opposer aux Loix: mais d'appuyer tousiours ses victoires sur l'excellence de ses Arrests, & non en la force des hommes; Et bien qu'Anthoine le traitast vn peu discourtoisement à son arriuée, ne voulut iamais pourtant en venir aux reproches, ny laisser dire à sa douleur des paroles que sa passion eust peu desrober à sa cognoissance, & ce qu'il faisoit à dessein, preiugeant qu'il n'estoit encores temps d'esuenter ses pensées, ains de les mettre à couuert de la discretion; Mais entendans aussi comme ses hayneux le blasonnoient sagement & à propos ourdit ceste responce; Que l'honneur qu'il auoit de porter sur le front le nom Auguste de Cesar, ne l'obligeoit pas moins de se mettre en danger pour la gloire d'iceluy, que de mourir mesme s'il en estoit besoin; Ven qu'entre tous les humains le premier des Césars, l'auoit choisi pour vrayement

luy succeder & mettre à fin choses grandes, le reputant seul digne de ceste charge, & de laquelle il seroit du tout indigne, si pour crainte d'aucun danger il rescidiuoit au peril, attendu que la peur ne l'auoit iamais tenu en repos, ny la paresse, ou faute de courage, dispensé de se trouuer au combat: mais bien conuertissant la peur en ioye, auroit repoussé avec courage, & soustenu avec prudence la fougue de ses ennemis. Ainsi vous ô mon Prince, riche honneur de nos iours, qui excellez sur tous les Roys du monde, mesmes sur les plus valeureux, & qui reponssiez loin de nous les fatalitez qui nous menacent, portez sur le visage non par adoption, ains par droit naturel, ce nom Auguste de Louis, esclattant & brillant pour le lustre que luy donne celuy de très-Chrestien, que vous ont laissé ces deux grands Roys en terre, & tousiours florissants au Ciel Clouis & Louis neufiesme, nommément duquel tesmoignez estre heritier nō seulement des Couronnes; mais aussi des vertus, *Quod habes ex illis non per te partum solum, sed & hereditarium*, puis qu'à la naissance de vos ieunes années, faictes esclor-

re au iour le zele qui vous porte à maintenir vostre Royaume en paix ; vous conformant du tout à ces paroles : *Rex sapiens stabilimentum populi est* ; exterminant & comme arrachant les Espines de ceste damnable & pernicieuse Rebellion , qui croissants pourroient suffoquer , & aneantir totalement l'honneur deu au Souuerain , & l'obeyssance qu'on vous doit rendre , puis que la valeur & prudence vous ont tiré du Ciel en terre , pour le bon heur des hommes.

Nam noua progenies cœlo dimittitur alto.

C'est ce qui vous fait declarer si librement & tenir des paroles si remplies de douceur & d'affection , que pour le bien de ce qu'elles portent en leur merite , ne sont dignes de nul autre que de vous ; sçauoir que pour ceste querelle , il ne vous semble pas seulement raisonnable de vous mettre en danger pour vengér vostre honneur , & en faire reparer l'iniure : mais de mourir si en est de besoin avec ces paroles *ἐν μὲν πόλει ἡμετέρῃ*. Ouy, ouy, mon Prince, vous avez le courage & la force prou vigoureuse, vous estes nostre Hercule François , qui dés le berceau de vos tendres an-

nées, esclusez les Serpens, chastians l'arrogance des superbes, & protegeant les foibles: Superbes dis-je, dont les insolences minuttent, la honte & la ruyne, ouy la ruyne, puis que leur lascheté en va iusques à ce point, que de rendre des rigueurs & des mespris pour des douceurs & traitemens aymables, & qui plus est, employent leurs armes temeraires contre le seruice de vostre Majesté.

Je me repusteray bien heureux, disoit cet Achille Romain, de mourir en combattant pour l'honneur de mon peuple, belles paroles, dignes à la verité d'un Roy, d'autant qu'aux courageux l'honneur est plus cher que la vie, & ainsi doit on moins craindre tous autres euenemens que la honte. C'est ce qui vous faict dire mon Prince, qu'ayant par vne grace speciale de Dieu, recogneu que les paroles faucuses de nos pretendus Reformez, teintes qu'elles sont de douceur & de miel, eludants vostre Royale autorité, n'estoyent que pour destourner vostre Empire des pays de Poictou, Guyenne & Languedoc. Mais vous qui faictes gloire de faire reparer le tort quel'on fait à autrui,

pouuez vous honnestement (puis que Iu-
 ste on vous nomme, *Vox populi, Vox Dei,*)
 laisser l'offence publique impunie? Vo-
 stre doux procedé SIRE, augmente leur
 Superbe, & croyent assurement que la
 crainte de leurs armes vous retient d'en
 venir aux mains, attendu diront ils, que
 l'homme trop considerant semble auoir
 plus d'apprehension que de resolution.
 Vostre Iustice est trop grande pour lais-
 ser escouller ceste faute, & permettre que
 goustions le reproche que pourrions
 encourir, s'ils regnoient plus long-temps
 parmy leurs insolences. Vostre Majesté
 se souuiendra SIRE, comme par plu-
 sieurs fois, elle leur a enuoyé personnes
 qualifiées, pour sçauoir d'eux à quel pro-
 pos se tenoyent leurs assemblées es villes
 de Loudun, & la Rochelle, & le sujet qui
 les mouuoit de vous deffendre avec tant
 de temerité l'entrée libre de vos villes:
 mais pour le peu d'estime qu'ils auroient
 fait de vos commandemens, ce luy auroit
 esté tref-iuste occasion de chastier ces pre-
 somptueux, vsant de pareille rigueur, qu'ils
 auroit fait en offenceant les vostres, & se-
 roit bien grande lascheté de n'auoir aucun
 ressentiment

ressentiment de tel outrage, & encore plus grande simplicité de croire, qu'ils feroient par raison, ce qu'ils ont fait au preiudice de vostre autorité. Ce qui est commis par ignorance trouue son excuse aupres des plus coupables : mais les fautes volontaires & qui se font avec malice ne se pardonnét point, en ce qu'elles trouuent leur condamnation au pres des plus pitoyables: Et pour ce faut-il que le chastiment suyue de pres telle temerité: Que vostre espée SIRE, face payer à tous tant qu'ils sont le iuste tribut de vos peines, il ne faut point differer dauantage, vous estant l'occasion si fauorable pour signaler vos exploits, vostre gloire & prudence.

Et neglecta solent incendia sumere vires.

Croyez assurement que pour vne si sainte resolution, le Dieu du Ciel vous sera fauorable, c'est luy qui fait qu'un nombre infiny de peuples, releue la gloire de ses triomphes & mandient ses conquestes (tous r'asseurerez qu'ils sont de leur estonnement) des franchises de vostre bien-veillance: Qu'elle chose vous retient donc mon Prince, que ne faciez esclatter la foudre sur les testes de vos ennemis. Les Dieux sont ir-

ritez contre leur perfidie, ils ne sont dignes de leur cholere, & veulent que vous seul executiez leur vengeance; Dieu ne veut pas tousiours chastier ceux qui l'offencent par ce que sa clemence contre pointe sa Iustice, & pour autant qu'il ny a plus de remedes au coups estranges de ses mains, ainsi ayme il mieux que les hommes executent son ire, afin que les affligez ayent le loysir de se recognoistre, & que chastiez & corrigez, ils soyent exemples à ceux qui ne font joug à sa diuinité; Et des rebelles ennemis de Dieu & de vostre Estat, si temeraires de heurter vostre autorité, & chocquer vos armes redoutables qu'en sera-il? Voyez mon Prince le mesestime que font ces Mutins de vos Ambassadeurs, & le refus qu'ils font de vous liurer vos villes, & leur sera ceste faute impunie? Qu'est-ce que l'on ne dit point par mespris au Heralut, que Vostre Majesté enuoya à ceux de Sainct Iean d'Angely, les sommant de se rendre, & que commandement leur en fut fait; & pour autant que sans aucune modestie ces Messieurs le traite vn peuri-goureusement, vsans en son endroict de propos insolents, leur fait voir aussi tost le

desplaisir qu'il a du peu de respect qu'ils ont à Vostre Majesté, & comme tenant lieu de vous, leur enjoindt se mettre à leur deuoir, ce qu'entendant quelque mutin d'entr'eux ainsi que Stenellus au Roy Agamemnon, prit la parole & fit telle responce, sa Majesté excusera bien (dit il) les Bourgeois de la ville, veu qu'ils n'ont pas encore esté sommés. Veritablement sa Majesté meritoit vne plus fauorable responce: Aquoy bon telle audace? sinon qu'il veullent qu'on croye asseurement qu'ils ont l'Ægide de Iupiter en main, pour intimider les Roys, & par icelle leur donner l'espouuante. Riottes que Tygranes ressentit bien vn iour quand se gaussant des Romains, qui au regard de son armée, n'estoient qu'une petite poignée de gens, il vsa de ces termes:

*Si legati sunt hī, multi sunt: quod si hostes,
per pauci.*

Car Luculle luy apprist du depuis à vser de discretion; & voicy que, comme vn autre Camille, vous cherissez mesmes ceux qui se voyants reduits, implorent les faueurs & douceurs de vos graces, & sous vne feinte apparence, ainsi que Decimus protestent ne iamais plus employer la for-

ce de leurs armes, contre le service de Vostre Majesté, qui n'a si tost le dos tourné que ces parjures, perfides, & desloyaux, se saisissent de vos places, brulent & sacquent tout, prophanes les lieux sacrez, praticquant tout genre d'hostilité à l'endroit de vos peuples; Et bien mon Prince, ou est vostre Justice, quoy? ces Rebelles seigneurieront & regneront ainsi au milieu de la France? quoy? ils partageront avec Vostre Majesté, la gloire de ses armes? l'autorité SIRE, est vne si grande ialousie, qu'elle ne peut souffrir de compaignon, non pas mesmes des amis,

ὅχι ἀγαθὸν πολυκοίτην εἰς κοίτην ἔχει βασιλεὺς,

Ce n'est assez au Prince victorieux de faire que ses ennemis seruent aux autres d'instruction, pour faire apprehender son courroux: mais il faut qu'il aduise de mettre les siens à couuert, & les garentir, en sorte qu'ils ne soyent le jouet de leur rage & furie, c'est ce que met en pratique ce Gentil Affricain, suyuant le Conseil que luy en donnent ses amis. Les Cartaginois venus aux prises avec les Romains, eurent fort à souffrir, ceux principalement qui

faisoient front en la bataille: car bon nombre des plus qualifiez & qui comme Souuerains, commandoyent és plaines de Lybie, esprouuerent lors & sans feintise la force & valeur de ce Prince: Mais comme il veoit quer rien ne luy resiste, & que pour ne pouuoit soustenir l'effort de ses armes, chacun luy faisant largue, s'escartant çà & là, & aussi qu'à voir seulement sa mine ils sont tous remplis d'effroy, tout en furie comme vn Tigre irrité, se iette en la meslée, tire vers celle part où il voit les siens engagez, pour le courage de ce cauteleux Annibal, & desirieux de les en retirer & guarentir, aux despens de ses ennemis, leur fait ressentir tout à coup les efforts de ces bras, & à les bien aymez les effects de ses armes, & ainsi qu'un Lyon és campagnes d'Affricque, deuorant l'Animal qu'il a pris en furie, traite en sorte ses ennemis, qu'il en fait tres-bucher bon nombre au pouuoir de la Parque, & par son labeur & grande diligence met l'armée en destroute.

La trop grande Clemence cause bien souvent autant de maux, comme elle pourroit apporter de bien. *Nam indulgens extra modum clementia suscitatur iras.*

O infames François que vous estes, hommes sans estime! qui ressemblez plustost des Barbares que des hommes François, qu'elle reputation acquerez vous auioird'huy, quel bresche faicte vous à vostre honneur, voulant heurter la puissance du Roy? auquel selon les Centuries mesmes de vostre Nostradamus, Calvin, deuez toute obeysance, & vous voulez par vne insupportable Ambition, tenir les mains liées à celuy, qui en bref changera l'arrogance des triumphes, aux pompes de vos trespas: & pour autant que le Ciel fauorise ses desseins, & vengera l'iniure que tu semble luy faire, aussi est-ce de luy qu'il attend le secours: car il est dit,

Per me reges regnant, & legum conditores iustitiam decernunt.

Per me principes imperant, & potentes decernunt iustitiam.

En fin ce FRANCOPHILE, Vaincu par vn excez d'Amour, voyans tes larmes Cocodrilles s'escouler le long de ta face, t'embrase doucement & te donne le baiser de paix. N'as tu point de ressentiment de sa bonté naturelle, quand si benignement sa Majesté t'accorda ce que tu pouuois desi-

rer d'elle, Souuienne toy des paroles obligantes qu'elle tint au sieur de Soubize, apres la reduction de Saint Iean d'Angely, qui ne sont moindres en substance que celles de Lyfander à son Antagoniste: Cher amy (disoit ce Prince Lacedemonien) que i'estime à l'esgal de moy mesme, puis que tant de Cavaliers sont en Volonté de te suiure, fais maintenant eslection de ce qu'il te viendra en phantasie, Vois quel party tu espousseras, ie ne t'y force nullement, que la honte ou la crainte de desplaire à quelqu'un ne decoyue point ton iugement, toutesfois si te diray-ie. Que ce seroit vne disgrace hors de saison de prendre le pire & laisser le meilleur. Quel traitement voudrois tu plus doux? & en suite de ce Discours, vous pardonna à tous esgallement, lors que la necessité plustost que la bonne volonté vous porta à ses pieds (ainsi que les Vaincuz) pour prendre Loy du Prince victorieux: Quels religieux sermens & protestations feis tu lors entre ses mains, que tu ne porterois iamais plus les armes au preiudice de ses commandemens, sous quelque pre-texte ou cause que ce fust.

Sur ceste asseurance mon Prince te fait en-

tendre sa volonté, qui est (ainsi qu'elle a
 tousiours esté suiuant ses Edicts, qui auront
 tousiours lieu, ainsi que ceux du Senat Ro-
 main, tant que son bon plaisir sera) que tu
 iouisse de la liberté de conscience; & de
 plus vous accorde liberté de vos personnes,
 vous remet en vos biens ainsi qu'auparauât,
 & ne respirant que vos affections vous fait
 donner mesmes sauf cōduit pour vos person-
 nes, armes & cheuaux, & toy contribuant
 à sy bons traictemens voicy que tost apres
 tu fais soufleuer Nerac cōtre sa Maiesté. Laf-
 che que tu es! est-ce là le guerdon que tu
 rends à tant de liberalitez que tu as receu de
 luy? Quoy! ton ingratitude sera le payemēt
 de tant de courtoisies; sçache qu'il est bien
 dangereux d'irriter & prouoquer les Dieux
 à courroux, pour autant qu'eux differands
 le chastiment des fautes ia commises, c'est
 pour d'autant plus en accroistre les peines:
 & ainsi gousteras en bref des fructs de ton
 indiscrette presumption, pource que
Vox Domini fremit instantis, Virgāq; tenentis.
Discite nunc miseri, & causas cognoscite rerum.
 Le Senat Ro. ne fit jamais tant cognoistre sa
 legereté (sans laisser Ciceron qui haranguoit

les autres) que lors que par bonne aduanture deux legions qui venoient de l'Affrique, arriuerēt inopinément en Italie, & vindrēt prendre port à la ville de Rome, lesquelles deux legions le Senat publioit hautement estre là enuoices par la faueur des Dieux, tāt pour les secourir, que pour leur donner cœur à deffendre la liberté publique à l'encōtre d'Auguste, & pource d'une cōmune voix reuoquerent ils soudain ce, que de sain iugemēt, & meure deliberation ils auoient arresté, & voicy que ce torrent d'eloquēce que la peur auoit tousiours tenu caché & reserué pour faire grands exploits, commence à paroistre au iour, & à se monstrier librement, & ainsi resolu qu'ils sont tous de mourir en cōseruāt leur liberté, ou de vaincre celuy qui, à leur aduis, sembloit les en priuer, donnent ordre en diligence à ce qui est du faiēt de la guerre: Car premierement l'on feist mōstre generalle des gēs qui pouoient estre en la cité, afin de faire choix de ceux, qui se trouueroiēt plus capables pour endosser les armes, ce qu'estāt ainsi fait, l'on donne ordre de poser sentinelles & de placer ces courageux en diuers lieux de la ville, les vns sont commis pour garder le Ianicu-

le (lieu d'importāce, veu que c'estoit le rendez vous de Iupiter & d'Anaë pour y cueillir les fruiçts delicieux d'un amoureux rauissement) autres pour la riuere, autres pour les nauires flottantes sur icelle, se promettans en fin, que ces choses ainsi ordonnees, donneroient de la terreur & causeroient l'espouuante à celuy que la peur n'a iamais peu fleschir ny faire changer la couleur au visage, & pour ce qu'ils ne pouuoient apporter aucune autre consolation à leurs disgraces, sinon qu'en se saisissans des personnes de la mere & sœurs d'iceluy, il eust esté contraint de frāchir ce que le Senat eust arresté là dessus, fist en sorte qu'on ne les peust trouver, quelqu'un disent qu'elles se retirèrent avec les Vestales, quoy qu'il en soit, deceus de leurs opinions & frustrez de leurs esperances, tout passit & fremit de crainte en la ville & bien plus qu'auparauant, eu esgard à cest orage qui menassoit leur ville; non d'un deluge: mais d'un embrasement total & vniuersel: Toutes lesquelles choses venuës à la cognoissance de Cesar pour cause de leur legereté se prit à souffrir, & cependant met peine de faire auācer son armee au plus pres de la Cité, & ce au

champ de Mars: Ce qui estoit fort les Romains, & à ceste occasion prennent iour de Conseil pour aduiser à ce qui seroit à propos de faire: L'on depute des Preteurs pour aller trouuer Cesar affin d'entendre sa resolution; il les reçoit fort humainement & leur faict vn doux accueil, leur faisant voir sur son visage le desplaisir & compassion qu'il a de leur misere, mais voians là Crassus qui en estat miserable l'estoit venu trouuer en diligence iusques en son pavillon Royal, implorant les faueurs de sa misericorde, en eust le cœur saisy, & sçachant comme,

Fortuna sauo leta negotio, &

Ludum insolentem ludere peritax,

Transmutat incertos honores,

Nunc mihi, nunc alij benigna.

Luy pardonna librement & aux autres aussi pareillemēt, & les regardant d'un œil, dans lequel la même courtoisie paroissoit, proféra ces parolles, *Reposez desormais vos esperances en moy, & ce faisant, sentirez redoubler vostre force & vigueur, vos ames seront eschauffees d'une nouvelle ardeur d'affection.* De sorte que pour toutes ces menées ceste ame courageuse ne don-

Cij.

ne quelque peu que ce soit de relasche à ses pieds, à ses mains ny à son courage, qu'il ne soustienne sa querelle, & ne poursuiue iusques au bout la pointe de ses trophées. Les fatigues ne le retiennent point, car il sçait que

— *Nil sine magno*

Vita labore dedit mortalibus.

Et pour ce que celuy qui est véritablement magnanime, & qui a le cœur ferme & tousiours vigoureux, se cognoist bien autrement en des occasions de peines & fatigues quand il ne plie & ne succombe point pour quelque affliction qui luy puisse arriuer, qu'en ses prosperitez (qui le plus souuent enflent & esleuent le cœur à ceux mesme qui l'ont petit de leur nature) aussi cest inuincible Achille pratique en sorte par sa prudēce l'amitié de ce peuple rebelle (quoy qu'il le voye à chasque mouuement tantost fauoriser les desseings d'un Pompee, tantost d'un Lentulus, Crassus & plusieurs autres) qu'il les reduict au point de dire ingenuement,

Nalla salus bello, pacem te poscimus omnes.

Et tout ainsi que l'eau jettee dans vn feu bien ardent ne l'esteint pas du tout, ains l'esmeut d'autant plus & excite ses flammes, ou comme vn bon pilote faict en-

core aller son Nauire apres que les voiles
 sont deschirez, & bien que l'équipage soit
 rompu & brisé, & qu'il se voye sur le point
 de seruir de pasture aux poissons de la mer,
 ne laisse pourtant d'un grand courage à faire
 voguer ce qui luy reste; ainsi les peines & fa-
 tiques en la pratique des armes, ne le peu-
 uent esbranler nullemēt, tant s'en fault que
 pour quelque disgrâce il ait perdu le cœur,
 puis qu'il se releue plus courageux toutes
 les fois qu'il a eu du pire, combattant con-
 tre son ennemy, ruminant cest oracle, & δὲν
 ἀνέμῳ χαμαί τ'ε. Ce sont les traux qui luy
 ont affermy le sceptre, & réduit d'autāt plus
 ses lauriers verdoyants. Ce qu'ainsi faisant,
 mon Prince, vous animerez le courage de
 tous vos bons François, qui pour vous ren-
 dre le seruice (auquel ils sont tous obligez)
 ne desirent rien tant que la meslee & les a-
 larmes, leurs pieds y veulent coure & leurs
 mains y veulent estre employees. Si vous
 vous representez, SIRE, comme Dieu fa-
 uorise vos desseings, & que les Leopards &
 les Lions rugissants ne sont pas plus cruels,
 bien que leur furie soit extreme, que ces Re-
 belles sont fastueusement audacieux, vous
 emploirez vostre force, (laquelle ils ont si
 souuent experimentez à leur dommage)

pour son honneur & gloire, & pour la maintenance de vostre estat: vous guarentirez la France du danger où elle se void estre, par le mauuais deportemēt de voz peuples Rebelles, vous la guarentirez, dis-ie, par le bō seruice que vous rendra vostre Noblesse courageuse: Au contraire si vous ne prenez à tasche de chastier ceux qui blasphement contre l'obiet de vostre volonté, ie ne fais point de doubte que ces Rebelles n'ayēt vn grand aduantage sur vous. Disposez vous doncques mon Prince à vous despouiller de toutes les considerations, qui vous pourroient destourner de ceste tant louable & genereuse entreprise: Et comme les Monarques n'ont point de plus grande æmulation que de laisser à la posterité vne bonne odeur de leur vie: Aussi vous rendrez vous par Iustice autant recommentable, comme vous estes par la douceur aimable. Ie ne suis point de ceux qui portez de passion, ne respirent riē tant que d'ensanglāter leur mains dans le sang de leurs freres, pour assouuir leur cruauté. Non, ce n'est point mon souhait, & desire qu'on le sçache, afin qu'à mon subiect l'on n'allegue cest adage,

τῇ μύδῳ φῶρε, τῇ δ' ἐπερ τὸ πῦρ.
 (οὐ γὰρ τὸ πῦρ ἐστὶν ὁ φῶρ, ἀλλὰ τὸ πῦρ ἐστὶν ὁ φῶρ.)

Ce n'est point mō humeur, ie le dis frāchement, mais il faut aussi sçauoir que le Sage nous dict, *νόμος πειθῶ*, & pour ce que le Prince est la Loy de Dieu parlante, il conuient doncques luy obeir, *Etiam discolo*, dit le Texte sacré, & puis qu'ils sont si humbles & tant obeissants voyons en les effects.

Premierement sa Maieſté les remet en leurs biens après tant de reuoltes, pour telles courtoisies, que font-ils en Guyenne, les Chefs principaux de leur Rebellion font souſleuer Nerac & autres es enuirōs, Clerac petite ville ſize ſur la riuiera de Lot, ſouſtiēt le ſiege & reſiſte quelques iours à la puisſāce Royale, deuant laquelle place meurt ceſt autre Diomedes Monsieur le Baron de Termes, en fin renduë au Roy, sa Maieſté leur pardōne de rechef, & les prend à mercy, & ainſi que le pere reprimendant ſon enfant, pour cauſe de quelques legeretez de ieuneſſe, luy porte la main ſoubs le mēton: ainſi ce Prince debōnaire ſe plaint humainemēt à eux des extorſions, qu'ils ont perpetrées & exercent encores tous les iours en ces pays de Languedoc, Poictou & Guyenne, & ſur leurs frauduleuſes promeſſes les renuoye librement, ſans qu'aucun tort leur ſoit
fait

faict, & neantmoins tout cecy ne sert de rien tant ils ont l'ame cauterisee & teinte de malice, qui me faict dire qu'entre eux,

*Rari quippe boni: numero vix sunt totidem, quot
Thebarum portæ, vel diuitis ostia Nili.*

Les chefs de bandes de cet Aiglon R. recognoissans leur lascheté voyās leur Empereur si clement & courtois reprindrent cœur plus grand, & courrousez qu'ils estoient contre eux mesmes se prosternēt à ses pieds & sans donner aucun repos à leurs yeux supplient tres-humblement sa Maïesté les vouloir decimer, ainsi qu'estoit la Coustume des Romains, mais cōme ils voyent qu'il n'en vouloit rien faire, demeurent tous confus plus honteux que deuant: & voicy, non pas pour vne fois seulement, ny pour deux ny pour trois, que ces rebelles François au lieu d'auoir quelque ressentiment des douceurs de mon Prince, tant s'en faut que cela soit au contraire ce leur est d'autant plus de suieēt d'en abuser sottement.

Dum vitant stulti vitia in contraria currunt.

Menodorus Lieutenant general des armées de Pompée tant par mer que par terre, traistre & desloyal si iamais il en fust,

fust, entendant comme vn iour ce ieune Prince traitoit avec ses deux grands ennemis Auguste & Marc Antoine & banquetoient en ses nauires, luy depesche aussi tost vn gentilhomme qu'il cognoissoit discret, avec lettres expressees à s^{on} Altesse, par lesquelles il luy donnoit aduis de penser quelles g^{ra}ces il auoit en s^{on} nauire, & que s'il vouloit entendre à venger la mort de son pere, ses nauires prestes comme elles estoient, qu'il n'en eschapperoit pas vn, à quoy Pompee respondit sagement & selon sa Noblesse: *Vnam Menodorus hoc ab'que me possit perficere.* De mesmes les rebelles ennemis du repos ne desirent rien tant que le desordre, & ainsi que l'on dit à pescher en eau trouble au preiudice de ceste pauvre France qui pour les maux qu'elle souffert par leur menée à peine peut elle reprendre haleine & reuenir en conualescence, & bien luy prend de ce qu'elle a vn si genereux Monarque pour luy faire reprendre sa premiere couleur. Courage doncques mon Prince, courage,

Dimidium facti qui caput habet. Sapere aude:

Incipe. viuendi recte qui prorogat horam,

Rusticus exspectat dum defluat amnis: at ille

D

Labitur & labetur in omne volubilis auum.

Ceste sentence seruit d'oracle à ce Rom. Hercules qui monstra bien par les effects comme il preferoit beaucoup plus la gloire des armes à sa propre vie, quand pour toutes raisons qu'on luy peust apporter il ne se voulut desister de l'entreprise qu'il fist sur Metulie ville principale & comme Metropolitaine du pays des lapodes, car comme il voit du haut d'une tour de bois qu'il auoit fait faire, que ses gens n'auantent rien à l'assault qu'il luy a fait donner, ains semblent plustost reculer pour l'effort que font ceux de la ville de le soutenir vaillamment; ils'en vient droit à eux le bouclier en main fendant la presse des ennemis & avec autant de vehemence comme quiverroit rouler du haut d'une montagne vne grosse pierre arrachée de son roc par l'impetuosité d'un torrent qui de vitesse l'emporte à la vallee: enfin engagé qu'il est à la bresche rend de grâdes preuues de sa cheualerie, ou secondez par les siens qui ne le voulurent abandonner pour la honte qu'ils eurent, demeura maître de la place aux despens de la vie de ses ennemis & fit ce iour des grands faits d'ar-

mes, dont il peut estre loüé & blasmé tout ensemble : pour autant que ce n'est aux grands d'estre vaillans si la prudence & le conseil ne moderela violence de leur courage & qu'ils ne gagnent autant de victoires, tant pour en auoir preueu les perils & les hazards que pour s'y estre exposez. *Confilio omnia prius experiri quam armis sapientem decet*, & ainsi par vn meur iugement doit donner ordre à la conduite de son armee tant pour se saisir des lieux auantageux, qu'à bien disposer ses gens & les animer au combat, c'est ce que sceut bien dire vn jour ce rusé Hannibal, quand porté de curiosité il voulut voir le corps du braue Marcellus qui estoit tout couuert de playes, & quoy que par son indiscretion il luy eust donné luy seul plus de peines que tout le reste des Romains, ce neantmoins fust il contrainct le louer pour valeureux soldat, mais le blasma il aussi pour prudent capitaine. Ainsi mon Prince n'est il nullement à propos de vous precipiter en ces occasions, mais commandez seulement & vous verrez comme vostre Noblesse belliqueuse, vostre peuple François en vous rendât l'obeyffance au pouuoir de leurs armes,

iront arborer vos enseignes au milieu de leurs places, & enterrer mesmes les viuans es sepulchres de leurs peres. Vostre courtoisie Sire, les y oblige, & la recognoissance des bien-faicts qu'ils ont receus de vostre Maiesté les en sollicite, & à l'enuy les vns des autres touchés d'une ialouse emulation s'offriront librement aux hazards & sans aucune crainte espouseront les dangers, non pour l'esperance d'obtenir par leurs faits la couronne de chesne qui autrefois n'estoit donnée qu'à ceux qui en des grandes meslees auoient preserué de mort leur souuerain Empereur, ainsi qu'à ieune Scipion pour son pere contre Hannibal au siege de Paue: mais pour participer à l'honneur que vous leurs daignez faire agreant leurs travaux, estant tres-assurez que

Dignitas poterunt regales addere maius.

Quel honneur voudroit on plus grand que de mourir pour sa patrie & pour la querelle de son Roy: c'est le prix que se sont proposés tousiours les plus vertueux & courageux: cause pourquoy nostre Hector François le Duc de Mayenne l'un des plus accomplis de son temps, ne ce-

dant à personne pour la viuacité & pour l'experience, & tout ainsi que la vanité est insupportable à ceux qui ont le cœur généreux, aussi ne pouuoit il autrement qu'il ne fist voir aux effets, que comme vne mousche qui plusieurs fois retourne pincer vne personne, encore qu'elle en soit chassée tant elle trouue de goust au sang humain: Ainsi l'affection qu'il a tousiours eu d'exterminer vos ennemis, luy a donné vne pareille enuie. *Et si iustitiam quis diligit: labores huius magnas habent virtutes*, dit le Sage. Le grád desir qu'il a de voir cet Estat florissant par la candeur des lis sous le regne de son Roy, luy fait & sans aucune crainte abandonner sa vie, & ce avec tât de courage qu'il est impossible plus, prompt aux assaux, ferme à la resistance, dont la presence caufoit autant de terreur à ses ennemis, (leur estant plus vtile d'euiter sa fureur, que d'oser soustenir l'effect de sa cholerre) comme de generosité és ames plus poltronnes. Mais las! ceste inexorable Parque qui dès sa naissance auoit ourdy la trame de ses iours, vient à rire à ses armes & en vn instant triomphe de sa vie, dompté qu'il est par la blesseure, qu'il a receu pour

ne s'estre voulu seruir des cheuaux de Pelee qui l'eussent peu guarantir & l'emporter arriere, de sorte qu'une seule iournee, que disie vne iournee, mais vn petit moment est suffisant de faire porter au vent ce qu'une longue suite de trauaux & indulgence diuine aura edifié en plusieurs anneés, qui me fait dire que le verre n'est pas fragile comme ce qu'il y a de plus ferme en la prosperité humaine, & que les noms, d'ombre, songe, vent, & fumée que nous donnons à ceste miserable vie, sont encore de trop glorieux tiltres & des comparaisons trop esleuées pour exprimer son infirmité, & ainsi ce braue Prince rendant l'esprit, son ame s'enuole dans le Ciel, laissant vn nombre infiny d'hommes plaignans & pleurans sa disgrâce: mais ses ennemis que la crainte retient & que la honte fait rougir, sont contraincts pour trophée de louanges d'en publier la gloire à la posterité vsans de ces parolles

--- *Hunc labor æquus prouehit & pulchro reddit sua dona labori.*

& ce qui plus me console est que

*La France en a le corps qu'elle auoit esleué
Et le cœur genereux qu'elle auoit esprouué,*

*Les Cieux en ont l'esprit , & les arts la memoire,
Les soldats le regret, & le monde la gloire.*

Après qu'Annibal eust emporté ceste tant grande & signalee victoire, dicté la iournee de Cannes, se porta sur le champ de bataille pour recognoistre les morts, & voyant là plusieurs de ses intimes qui despoillez de leurs armes, estoient priez de vie par la valeur d'Aemile & de Seruile son collègue, n'ayans peu esuiter les malheurs de leur constellation, & ne pouuant Annibal faire parler sa douleur, tant elle est vehemente, iette plus de soupirs qu'il ne disoit de parolles, & se tournant enfin vers ses plus affidez, donne ce passeport à ses regrets. Helas mes chers amis, ie n'ay pas besoin de semblable victoire. Ce que j'allegue à propos, mon Prince, veul la perte qu'avez faite de tant de braues hommes, qui portez de passion à vous rendre seruice, ont abandonné leurs familles, & sans aucune peur ont preferé les dangers loins de leurs proches aux caresses de leurs femmes, & aux blandices de leurs parens. Ha mon Prince, ie puis dire & confesser ingenuement qu'il ne vous est pas besoin d'une telle seconde

victoire, veu que pour n'auoir esté bien
 seruy, estes priué du support de vos plus
 fidels seruiteurs, & n'en n'aurez aucun res-
 sentiment? entendez les gemissement &
 & sourspirs qu'esslancent dans le Ciel du
 plus profond de leurs poitrines, ces pau-
 ures Grecs aupres de Patrocle, voyez
 mesme comme Achille en commence le
 dueil & les baisers que ce valeureux Ae-
 nee donne à Misene son amy, sourspirant
 continuellement, en luy rendant les der-
 niers honneurs de ces funerailles, quels
 regrets n'a il point en l'ame abandonnant
 ce Mausole champestre. Luculle n'en fait
 pas moins pour le vaillant Pomponius
 son fidel, qui pour compassion qu'il a de
 sa disgrâce succombant sous les armes de
 Mithridates, accourt à son secours la lar-
 me à l'œil & la douleur au cœur, & animés
 les siens vse de ces parolles; quoy mes
 amis seroit il hõnorable que retournassions
 en nos pays sans qu'auparauant n'ayons
 eu raison de cet esclandre. Non mes chers
 amis cela ne se peut faire, mais disons

(----- simul imis saxa renarint

Vadis leuata, ne redire sit nefas:

Que plutôt disie la terre nous en-
gloutisse

gloutisse en ce lieu où nous sommes, que de laisser nos aduersaires triompher ainsi de nos amis & leur permettre auoir sur nous cest aduantage, au moins aurons plus de gloire de petir de la sorte. Embrassez Sire, ceste resolution, puis que veritablement elle est digne de vous, & ainsi que Lucolle, Hannibal & tant d'autres, faites goustier à vos ennemis l'amertume, (puis que la douceur n'y fait riē,) des fruits de leur audacieuse temerité, & à ce propos souenez vous mon Prince, combien la diligence est requise à vn grand Capitaine, & le mal qu'il arriue de quitter le dessein, qu'auons vne fois avec solide iugement arresté en nous mesmes, & quand par vne grace speciale (la diuine bonté authorisant nos entreprises) nous nous voyons approcher de la palme. Les plus rusez & aduisez au fait de la guerre, ont pratiqué de tout temps ceste maxime. Je mettray en auant le second des Césars lequel à Rome entendant comme Pompee estoit deuant Cordoue mēt aussi tost ses troupes à la campagne, & fait tant par ses diligences avec ce petit nombre de gens qu'il auoit, qu'en l'espace de 27. iours

il se montre en teste à son ennemy, où
 apres s'estre emparé de lieu auantageux
 luy faict donner quelques legeres es-
 carmouches à fin de l'amener au combat.
 Mais cestuy-cy preuoyant telle ruse ne
 bouge nullement, & ses soldats comme
 en le mesprisant faisoient retentir l'air par
 leurs cris de rusee, qu'ils payerent chere-
 ment incontinent apres: Car ce valeureux
 Prince poursuiuant ses desseins le redui-
 sist en sorte, & par sa diligence & bonne
 experience qu'onques du depuis il n'osa
 soustenir la force de ses armes,

Πόθεν παρελθὼν μεκέντι ἔπι πάλιν.

Dit le Prouerbe Grec. Charles sep-
 tiesme qui est l'honneur des Roys ne per-
 dit iamais cœur, pour quelque disgrâce
 que la fortune luyait peu preparer par son
 inconstance, & iacoit que la plus part des
 villes de son Royaume se fussēt reuoltées
 & secoüez le ioug de son obeyssance, ne
 demord point de ses premiers desseins, &
 si tost qu'il voit la fortune changer se sert
 de l'occasion, & par sa bonne conduite,
 reprend toutes les places, & chasse avec
 honte les Anglois de la France. Et quoy
 mon Prince, apres tant de cōquestes vous
 irez en arriere? Non, mais comme la Liô-

ne s'attriste estant de retour en sa cauerne
 cherchant par monts & vaux pour trou-
 uer à la piste ceux qui emporte ses petits
 Lionceaux, ainsi pareillement dentez vous
 mon tres-honoré Prince, rechercher
 toutes occasions de chastier vos ennemis
 & leur faire ressentir l'effect de vostre in-
 ste courroux, puis qu'ils ont rauy la vie à
 tant de bons François. La resolution fait
 tout, mon Prince, c'est pourquoy ces dia-
 bles incarnez ennemis de Dieu & des hō-
 mes, qui par leurs cauillations vont trou-
 blans le repos de la France, quand ils ver-
 ront que, (comme vn autre Achile à qui
 le courage & la cholere augmente en en-
 dossant les armes que Vulcain frabriquā)
 vous irez la teste baissée droict à eux, vous
 les verrez lors saisis de frayeur & de crain-
 te, & seront esblouys pour ne pouuoir,
 (ainsi que de celles d'Achilles) soustenir la
 splendeur de vos armes, & reduits qu'ils
 seront, diront tout hautement *λοδοίκος τῷ*
Κέλτῳ βασιλεῖ Manius Empereur pour les
 Rom. en Syrie au moindre danger qui se
 presente, passit de crainte, & per d'aussi
 tost le courage: vn autre Antiochus pour
 ne se seruir du conseil qu'on luy donne est

aussi tost saisi d'une terreur panique, & par sa lâcheté se rend au desespoir : Mais sçachez, ô rebelles; que celuy que la fortune conduit & vertu accompagne ne leur ressemble point. Je veux qu'au Mont aux banis, ie veux dire Montauban, vous ayez fait quelque temps resistance, fait des faillies, dressé des embusches secretes, & mesmes que les enfans, les femmes & les vieillards ayent deffendu les murailles, en exposants leurs vies pour le salut de la ville, bref que ce petit relasche és surceances d'armes vous donne les moyens de reprendre haleine: C'est pour vous chastier d'autant plus aisement, & comme les Metuliés qui voyans leur affaires commander à languir, & cest ardeur de rebellion qui estoit par les villes mutinees se rallentir, aymoient mieux tremper leurs mains en leur propre sang, que non pas estre pris & menez en triomphe; ainsi ferez vous les bourreaux de vostre tyrannie pour punir sur vos personnes l'offence de vostre desloyalle perfidie. Peut estre me direz vous que la passion dont ie pourrois estre touché me fait tenir ce discours vn peu trop aduançageux pour vn homme de ma for-

te: à cela ie respons & avec verité, que le plus fort de ma douleur ne prouient pas de ce qu'avez si laschement faussez vostre foy, mais de ce que n'avez aucun ressentimēt de l'integrité de celle de vostre Prince. Le marisson dis-je que i'en pourrois auoir ne prouient pas de ce que vous avez le cœur glassé, ains de ce que mon Roy est encores plain de flammes. Mais representez vous tous vos iours de souplesse vous avez cōmancé par ombrage & mesfiance, mais vous continuerez par les soupirs & larmes, & acheuerez avec vn honteux repentir, souuenez vous de ces paroles & pour autant que mon Roy est assisté de l'immortel, vous cherchez vostre ruine en vostre ambition, par la suite de vos disgraces, vous employez vainement vostre industrie à donner vn remede à vos peynes: car le bras victorieux du Roy est soustenu de Dieu, qui desrobe la victoire à la fortune, pour en gratifier ceux qu'il ayme. C'est pourquoy Sire, il est bien à propos que vostre Maiesté se figure tousiours l'assistance du Ciel, pour conduire à chef vos entreprises; C'est de là que viennent les lauriers, les Royaumes, &

les Empires, & tout ce qui recommande la valeur & prudence des hommes, & de ce pouuons nous en parler & auoir cognoissance par les doctes escrits de ceux qui nous ont fait part de leurs traualx & veilles. Et à ce propos oseray-ie vous dire que vostre Maiesté fera tousiours curieuse recherche de telles gens à l'emulation de ces deux grands & puissants Genies de l'Vniuers Alexandre & Cesar, pour autât que leurs traualx & genereuses actiôs seroient enseuelis avec eux, & n'auroit leur gloire aucun lustre que le silence, s'ils n'en renouueloient la memoire par leurs doctes escrits (entre lesquels & sans comparaison ie consacre à vostre Maiesté, outre mon sang & ma vie, le Talent que Dieu m'a donné,) en vn mot mon trescher & tres-honoré Prince ce n'est rien de la valeur d'un Roy si les louanges des bouches d'or ne le recommandent.

FIN.

page 25. ligne 14. *lisez* de mesmes ces rebelles. p. 27. l. 17. *lisez* industrie pour indiscretion, p. 30. l. 19. *lisez* que la crainte retient & la honte fait rougir.

